

Autasi su'esu'ega i le taua o le sao o matua i ausiga

Levi Tavita,

E le o se upu e avane ai le moni o lenei mau ua avea ma autu o la tatou faasoa. O loo faamautuina pea i su'esu'ega faagasolo lona moni i soo se atunuu. E le itiiti le eseesege e tula'i mai, e mafua i le sao o matua i fanau ia latou meaa'oga. E manatu se tasi su'esu'ega o le ki lea i le manuia o fanau i a'oga, tainane o le fua e iloa ai le aga'i i luma pe leai.

E mafai ona aotele se faaiuga a nei uma su'esu'ega, e faapea, e le faatonuina e le tupe poo le tulaga mativa o fanau so latou lumana'i manuia i a'oga.

O le mau tauave lea o loo pepese ai pea le to'atele— e le sese sea taofi— e iai le so'otaga o le valea ma le mativa. E iai le faiā a le vaivai i le literasi ma le leai o ni tusifaitau i le fale. Ae iloga foi se pasene o fanau e o mai i si'osi'omaga faigata ae o loo iloga a latou taumafaiga i le a'oga.

E faapefea ona faamatala lea mea? O le tali a vasega su'esu'e ua ta'ua, e mafua mai i le fale; a lelei ona tapu'e le tama ma le teine i le aiga, ona le pine lea va'aia ni suiga mata'ina i le taumafai. Muamua i le faateleina o la latou utuvagana. E iloga aiga e talanoa matua i fanau, e fiafia matua e tautatala, o aiga na e faatusa i le elele lelei. O se fale e tumu i 'oa gagana, tu ma aga e fagaina le tama i ona sulu ta'itasi uma.

Ua iloa aiga e mau i le utuvagana o le poto salalau; o na e lelei a'oga a le tina poo le tamā poo matua uma. Aemaise lava

pe a talanoa faasoa ma fanau. O aiga foi na e mafai ona avatu le fesoasoani 'anoa i fanau i taimi o su'esu'ega.

A ua iloa foi le eseese e tupu pe a to'aga soo se matua e talanoa i fanau, ma fa'aalu o latou taimi e galulue faatasi ai. I su'esu'ega sa ta'ua, o loo faataua ai le faitautusi faatasi. O ina e faavae a'e ai se utuvagana malosi ma faapea ona faateleina ai upu e iloa e le fanau. Ua iloa lava le maualuga o le utuvagana a aiga e lelei a'oga a matua, ae mafai lava foi e isi aiga ona ausia le 'afa o lena, pe sili a'e foi, e aofia ai ma upu moomia e faavae ai a latou galuega tusitusi.

O lona uiga, e mafai lava ona finau atu i latou i tapulaa e pasi ai, ma laasia foi ausiga na a le vasega i luga. Lona uiga foi, e avanoa fanau uma i tumutumu pe a lagolago matua. O lena e ta'u mai, e le pulea e le mativa le iuga o se tama ma se teine, pe a fai lena e 'anoa le sootau'au a matua.

O le fe'au taua, afai e mana'o se matua ia poto lana tama, o ia la e tamua ae le o le faia'oga. I nei aso o le fe'oma'i o potua'oga, e leai se mautinoaga a mea e maua e tamaiti

uma se a'oga 'anoa mai le faia'oga e tasi. Upu moni, ona pau lea o le faauilavea e le molia ai se matua i le faamasinoga.

I Aotearoa nei ua apo e a'oga le Mana Ake, ona o lona faatauaina o le sao o matua i le fale, aemaise ai o le lagolago 'anoa e ofoina atu e a'oga i matua e mautomai ai.

I se tasi su'esu'ega, ua iloa ai ni suiga e ala i kalapu faitautusi a matua ma fanau, lua pe tolu ni aiga e

faapotopoto i afiafi e fai le faitauga tusi. Faamaonia i su'esu'ega, e afuafua le poto o le tagata mai le taimi a o tauave e lona tina. O taimi tonu ia e tatau ai ona talanoa i ai le tina i lana tama. O fanau foi na e popoto mai lava i upu ma faaleoga a o laiti.

O le alii o Tusitala e ana le upu, e maumau gagana pe a leai se isi e lagonaina. O le fe'au— vave talanoa i lau tama, auā o ai se isi e tatau ona vave lagonaina? O Tusitala foi e ana le upu, e gata lou atamai i le mea e gata ai lau utuvagana. E saga faamauina le moni o le muagagana a Samoa, e fafaga tama a manu i fuga o laau, ae fafaga tama a tagata i upu.

Oketopa 2021